

REGIONAL NEWS BULLETIN

HEADLINES (EVENING)

- 1 Home Ministry chuan ramdangmite luh khuahkhirh chungchangah vawiin khan Mizoram leh state dang 2-te nen biak-hmuh-theih hmangin sawihona a buatsaih.
- 2. Krismas leh kum thar chawlh hmanga kal larsap Dr. Hari Babu Kambhampati chu vawiin khan Aizawlah a lokir.
- 3. President Droupadi Murmu, Vice President Jagdeep Dhankar leh Prime Minister Narendra Modi-aten Prime Minister hlui Dr Manmohan Singh-a ruang an kil.
- 4. Vawiin khan Union Cabinet-in Dr Manmohan Singh-a sunna hun an buatsaih.

<><><>

PROTECTED AREA REGIME

Ministry of Home Affairs chuan venhim ngai bik state a ramdangmite luh chungchangah vawiin khan Mizoram leh state dang pahnihte biak-hmuh-theih hmangin sawihona a buatsaih.

Home department hotute’n an sawi danin Ministry of Home Affairs (MHA) hotute nena biak-hmuh-theih hmanga an inkawmna-ah hian tun hnai a Myanmar ramri hnaih state 3, Manipur, Mizoram leh Nagaland home department hotute an tel a. He’ng state pathuma kum 14 zet ramdangmi luh khuahkhirhna phelh a nih tawh hnu a, tun hnai a, khuahkhirhna kalpui leh tura tih a nih tak avanga sawiho an ni. MHA hotute chuan Myanmar ramri a awm Mizoram, Manipur leh Nagaland a lut tur ramdangmite chuan e-Foreigners Regional Registration Office (e-frro) portal-ah a bika luh phalna Restricted Area Permit (RAP) leh Protected Area Permit (PAP) te chu online a dil tur a nih thu an sawi a. Hemi chungchang leh a kalpui dan tur hi home department hotute chu sawipui-in an hrilhfiah a ni.

Ramdangmi lo lutte khuahkhirhna hlih a nih hma khan Mizoramah chuan ramdangmite’n a bik taka phalna an neih lo buaipuisak turin home department, SP, CID (Special Branch) leh district SP te chu ruat an ni thin a. Tuna hetiangah khuahkhirh a nih leh dawn takah pawh hian a ngai ang bawka a buaipuitu ngaite hman leh phawt a nih tur thu home department hotute chuan an sawi a. Kum thar tirah hian helama mawhphur turte pual hian training buatsaih a nih tur thu an sawi bawka a ni.

Kar kal ta Thawhlejni khan MHA hian Manipur, Mizoram leh Nagaland chief secretary-te hnenah lehkha thawnin an state a ramdangmite an luh dawnin RAP leh PAP an neih a ngai leh dawn tih a hriattir a. Kum 2010 atanga hlih rih, he khuahkhirhna tuai thar leh a nih chhan hi ramdangmite’n he’ng state-ah te hian buaina an chawhchhuah hlauhthawn vang niin an sawi. RAP leh PAP neih hmasa tura tihna hi Foreigners (Protected Areas) Order, 1958 hmanga kenkawh thin a ni a, tuna khuahkhirhna thlah zalen hi December, 2027 thleng a ni chungin sorkar laipui chuan a rawn thar thawh leh ta thut a ni.

(Desk)

<><><>

CONDOLENCES

Chief Minister Pu Lalduhoma chuan Prime Minister hlui Dr Manmohan Singh a thihna-in a thawn thu leh a chhungte a tawrhpu thu a sawi.

Chief Minister chuan Dr Manmohan Singh-a’n ram tana tha a thawh hnem thu sawiin ram ei leh bar hmasawna leh sorkar inrelbawlna tha siam kawngah hna ropui tak a thawk a ni a ti a. Mi fng leh ropui tak ni chungah inngaitlawm em em mihring a nih thu sawiin uiawm a tih thu Pu Lalduhoma chuan a sawi a. A chhungte a tawrhpu tak zet thu a sawi a ni.

Mizoram Pradesh Congress Committee President Pu Lal Thanzara pawhin Prime Minister hlui, Dr Manmohan Singh a ui thu nizan khan a sawi a. India ram ei leh bar dinhmunah a tha zawnga danglamna lian tak siamtu a ni a ti a. Ram hruiatu lian tak ni chungah mi thawm zawi leh inngaitlawm a nihna chu chhuan lo awm zel tur te ngaihsan a nih phah zel dawn tih sawiin a thihna chu ram tan channa nasa tak a nih thu a sawi a ni.

(Desk)

<><><>

POLICE STATEMENT

Kum 2024 Christmas vuakvet chhungin mipui-in halpuah leh halmawi hal chungchanga sorkar thuchhuah tha taka an zawm avang leh buaina leh harsatna awm lo tura an thawhpaina avangin Mizoram Police chuan mipui hnenah lawmthu an sawi.

IGP (Headquarters), Chief Public Relation Officer (CPRO) ni bawk Pu Lalbiakthanga Khiangte chuan vawiin khan thu chhuahin mipuite'n ralmuang taka hunpui hman chhunzawm a nih theih na'n Mizoram Police-te'n theihtawp chhuah zelin, district Police Duty pangngai bakah hunpui chhunga Aizawl khawpui chhung vil turin Senior Police Officer rual, Addl. S.P atanga Selection Grade mi 12 leh Zonal Officer (Dy. S.P) mi 4 ruat an nih bawk thu a sawi a. Kumthar lo thleng turah hian Mizoram Police chuan ralmuang taka mipuite'n hun an hman theihna'n theihtawp a chhuah leh dawn a, mipuite pawh sawrkar thu zawm a, halpuah leh halmawi lam chite hal lova tha taka Police-te thawhpui zel turin tih tak zeta an sawm thu an thuchhuah chuan a tarlang a ni.

(PR)

<><><>

CRIME REPORT

Nizan atanga tukin thleng khan Mizoram puma Police station-ah tang 11 awmin mipa hlir an ni.

Police station hrang hranga an hren zingah hian zu ruih vanga man 3, inchhungkhura buaina siam avanga tantir 2, ruihhlo kaihhnawih a man 2, Women PS thubuai 2, rukru a rinhlelh man 1 leh Inner Line Permit neih loh vanga man 1 te an ni. Police station leh out post zingah tang awm lohna police station 10 a awm.

Aizawl Police Station-ah tang 4 an kawl a; zu ruih vanga man 2 leh hmeichhe chungchang vanga thub uai nei 2 te an ni. Bawngkawn Police Station-ah tang 3 kawlin, zu ruih vanga man 1, chhungkaw tihbuai vanga mantir 1 leh ILP neih loh vanga man hnamdang 1 te an ni. Champhai PS ah ruihhlo thubuai a man mi 2 kawlin, Heroin tlem te mansak an ni a. Lunglei Police Station-ah rukru a rinhlelh man 1 kawlin, Kulikawn PS ah chhungkua a buaina siam vanga tantir 1 an kawl bawk a ni.

(Corr)

<><><>

NO TOLERANCE DRIVE

Aizawl Traffic Police te'n tun thla ni 9 atanga lirthei endik runpui, No Tolerance Drive an buatsaih chhungin lirthei 1,359 endik a ni a, an pawisa chawi tlingkhawm chu cheng nuai 2 sing 2 sang 6 a ni.

Aizawl Traffic Police hotuten Akashvani Aizawl an hrilh danin No Tolerance Drive hman chhunga lirthei an endik zat 1,359 zinga lirthei 151 chu an man a. No Tolerance Drive kalpui tan ni, tun thla ni 9 ah lirthei 35 endik a ni a, a ni telin lirthei man hi a tam zel tih Akashvani correspondent chuan a sawi a ni.

VC of Lalengmawii

Krismas vuakvet chhung khan Aizawl Traffic Police te chuan ngawrh takin duty an kalpui chhunzawm zel a. Krismas Urawk Ni, ni 24 ah khan Aizawl huamchhunga lirthei khalhtu dan bawhchhia pahnih man an ni a, an pahniha an pawisa chawi belhkhawm chu cheng 5,500 a ni a. Krismas Ni leh nimin khan lirthei khalhtu dan bawhchhia pakhat ve ve a man bawk a ni.

(Corr)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

(NSD)

<><><>

LUNGLEI SEIZURE

District bawrsap-in FIR a thehluk behchhanin Lunglei district Police te chuan halpuah leh a kaihhnawih Rs 9,000 hu vel an man.

Krismas lawmna boruak a zo a, vawiin atang khan nun dan phung pangngai-in Lungleiah hun hman a ni a, Sorkar pisa pawh in hawngin Bank leh sumdawmna hrang hrang pawh an in hawng. Pisa kai erawh an tam lutuk lova, dawr inhawng bawk mahse mipui an tam lutuk lo. Halpuah ri hriat tur a awm loh bakah a hal man an awm lo. Hetihlai hian bawrsap Pi Navneed Mann-i'n FIR a thehluk bawhzui-in Police te'n RVL Store Chanmari atangin halpuah leh halmawi Rs 9,000 hu vel an man a. Dawr neitu hi BNS section 223(a) hmanga thubuai siamsak a ni a, thil awm dan chhuizui mek zel a ni.

Hetih lai hian vawiin chawhma lam khan Lunglei district SP Pu Jerome Lalmuankima hovin a pisa-ah Lunglei khawpui chhunga Police Officer zawng zawngte kalkhawmin Krismas vuakveta an hnathawhte thlirletna hun an hmang a. Police Officer kal khawmte chuan an duty-na hmun theuh report pein Lunglei khawpui chhungah boruak duhawm lo leh harsatna thleng a awm loh thu an sawi a. SP chuan Police Officer kal khawmte hnenah kum hlui thlah zan leh kum thar inkarah pawh mipuite him zawk na'n khauh lehzualin tan la turin a fuih a. Traffic Police-te pawh rui chungah lirthei khalh leh mi dang tana hlauhawm khawpa lirthei khalhtute lakah dan angin hma la turin a tih bakah; two wheeler silencer/exhaust ring lutuk hmangtute chungah pawh dan angin hma la turin a hrilh. Mipuite chu kum hlui thlah zanah halpuah leh halmawi hal lo turin a ngen a, sorkar thupek bawhchhia a hal luite chu an chungah dan angin hmalak a nih tur thu a sawi baw a ni.

(Thangmingliana Renthlei, PTC Lunglei)

<><><>

GOVERNOR

Mizoram larsap kal chhuak tur Dr. Hari Babu Kambhampati, Krismas leh kum thar chawlh hmanga Andhra Pradesh a a kal chu vawiin chawhma khan Aizawlah a lokir.

Larsap hian chawhma dar 11 vel khan Lengpui tumhmun atangin Raj Bhavan a rawn thleng a, Raj Bhavan official-te'n an lo hmuak a. Inrinni kal ta a North Eastern Council plenary session hmanga Agartala a a kal kha humpui chhung chawl turin an khaw lamah kalin kum thar hnu-a lokir leh tura a inruahman lai-in Odhisa larsap a ban tak avang leh a ai-awh tura President-in a ruat tak avangin a chawlh hun kai tawi-in Mizoramah a lokir leh a. Kar leh Thawhtanni emaw khian Aizawl a chhuahsan leh dawn ni a hriat a ni a, Bhubaneswar Raj Bhavan lamah a insuan lut nghal tura ngaih a ni.

Puan tawh angin Odhisa larsap Raghubar Das banna President Droupadi Murmu-i'n a pawm tak avangin state thenkhat a larsapte awmna siksawi a ni a. Mizoram larsap thar atan General Vijay Kumar Singh chu a ruat a, Mizoram thenawm buaina nasa takin a tuam mek Manipur larsap atan union home secretary chawl ta Ajay Kumar Bhalla chu ruat a ni bawk.

Larsap thar tur, India ram sipai lal ber 24-na leh union minister of state ni a ministry pawimawh hrang hrang lo chelh tawh Gen. Vijay Kumar Singh hian engtikah nge Aizawl a rawn thlen dawn tih an la hriat rih loh thu Aizawl Raj Bhavan-a thawkte chuan an sawi a ni.

(Desk)

<><><>

PRESIDENT MURMU, VP DHANKHAR & PM MODI PAY TRIBUTES TO FORMER PM DR MANMOHAN SINGH

President Droupadi Murmu, Vice President Jagdeep Dhankar leh Prime Minister Narendra Modi-aten Prime Minister hlui thi ta Dr Manmohan Singh-a ruang chu vawiin khan New Delhi-a a chenna inah an kil.

Hemi hnu-a Narendra Modi-a'n thuchah a tihchhuahah Prime Minister hlui Dr Manmohan Singh-a chu rampumin a sun takzet thu a sawi a. A nun kha miin an beih vaka hlawhtlinna hmuh theih a nih dan, thang thar zelte tana entirtu a ni a ti. Mi rinawm, economist ropui leh huaitu tha ni tura mi inpe zo a ni a ti.

India ram hruaitu langsar, Dr Manmohan Singh-a ruang kiltute zingah hian Union Ministers Amit Shah, JP Nadda, Rajnath Singh, Jyotiraditya Scindia, leh Congress President hlui Sonia Gandhi te, Lok Sabha-a eptu leader Rahul Gandhi bakah Congress President Mallikarjun Kharge-te pawh an tel a ni.

Dr Manmohan Singh-a hi an ui thu leh an sun thu khawvel ram hrang hrang hruaitute pawhin an sawi chhuak hlawm a ni.

(NewsOnAIR)

<><><>

UNION CABINET PAYS HOMAGE TO DR MANMOHAN SINGH, OBSERVES 2-MINUTE SILENCE

Vawiin khan nizan lama thi ta Prime Minister hlui Dr Manmohan Singh-a chu Union Cabinet-in a sunna hun an buatsaih a. Ramin mi chungchuang, economist hmingthang, hruaitu ropui a chan a ni an ti.

Dr Manmohan Singh-a hian ram hnukah a sulhnu a hnutchhiah a ni tiin a sunna resolution an pass a, ngawi rengin minute 2 chhung an ding baw a ni. Kum 1991 leh 1996 inkara Finance Minister a nih lai khan India economic chu a tung ding leh a ni tih chu tlang hriat a ni, an ti bawk.

Dr Manmohan Singh-a ruang hi ram chawimawina famkim nen thlahliam a ni dawn a. Sawrkar laipui leh a hnuaia pisa zawng zawngah ni chanve chawlh puan a ni bawk.

(NewsOnAIR)

<><><>

FORMER PM DR MANMOHAN SINGH'S FINAL JOURNEY TO BEGIN FROM CONGRESS HEADQUARTERS ON DEC 28

Prime Minister hlui Dr Manmohan Singh-a vuina chu naktukah New Delhi-a Congress headquarters atangin tan a ni ang.

Congress General Secretary K C Venugopal sawi danin Prime Minister hlui ruang chu waviin bakah zaninah a chenna inah a la awm chhunzawm ang a, naktuk zingah Congress headquarters-ah lak a ni ang, hei hi party hruaitute leh mipuiten amah an thlahna remchang atan tih a ni.

(NewsOnAIR)

<><><>